



Kgetha bagwera bao ba lokilego

Sepedi



Khanyisa Mukansi

Kgetha bagwera bao ba lokilego

Mongwadi ke Khanyisa Mukansi
Moswantšhi ke Lutfia Ebrahim-Kamish



Phetolelo ya puku go Sepedi e dirilwe ke Maureen Ramusi



GRADE 2

Barutwana ba be ba thabile ge ba tsena ka phapošing ya Kreiti ya 2 mosong.

Ba be ba apere yunifomo ya bona ya mebala ya boso le bošerolwane.

Ba be ba dumedišwa ke morutišigadi wa bona, morutišigadi Maleka.

O be a ikgodiša ka phapoši ya gagwe.

O ile a hlohleletša le go thekga barutwana thutong ya bona.

Go be go na le khutšo ka phapošing.



Khutšo yeo ya thoma go senyega.

E senywa ke go timelela ga diphensele.

Ba thoma go nyakana le diphensele, eupša ba se di hwetše.

Se se ile sa makatša morutišigadi Maleka.



Bothata bja golela pele. Ba bangwe ba barutwana ba ngongorega gore dijo tša bona di utswitšwe.

Ba be ba maketše ka nako ya go khutša ge ba hwetša dikhafothini tša bona di se na le selo.

Ba be ba swerwe ke tlala ba duma bagwera ba bona ge ba eja.

Morutišigadi a ba rekela borotho le senwamaphodi.



Go bile molaleng gore go be go na le lehodu ka phapošing.

Barutwana bjale ba thoma go dula ba šika le dikhafothini tša bona. Ba be ba sa kgone go rakoka ka go iketla.

Morutišigadi a loga leano la go notlelela dikhafothini tša bona ka khapotong ya ka phapošing.

O ile a omanyana bao ba nago le mekgwana ya bohodu. A tshepiša gore lehodu le tla humanwa.



Ka morago ga matšatši a se makae,
barutwana ba thoma go timelelwa ke tšhelete.

Letšatši ka letšatši barutwana ba babedi goba
ba bararo ba ngongorega gore tšhelete ya
bona e timetše.

Ba hweditše mekotlana ya bona ya dipuku e
bulegile, gomme tšhelete ya bona e utswitšwe.

Morutišigadi o be a maketše ge barutwana ba
be ba lla ka se.

O thomile go kgolwa ge a hwetša gore le yena
o utsweditšwe tšhelete.

Lehodu leo la go se tsebje le be le fekeetša
phapoši.



Morutišigadi a ngwalela batswadi mangwalo.
O be a ba botša ka ga lehodu leo le lego ka
phapošing.

A be a kgopela batswadi gore ba rute bana ba
bona gore ba se utswe.

Go be go se na le motswadi yo a dumelago
gore ngwana wa gagwe ke lehodu.

Hlogo ya sekolo a kgala barutwana ka ga kotsi
ya go utswa.

A kgopela mahodu gore ba itšweletše go yena
go tlo humana thušo.



Ka letšatši le lengwe Koki a ya go morutiši wa gagwe a lla. Koki e be e le morutwana wa mabjoko.

A botša Mohumagadi Maleka gore puku ya gagwe e utswitšwe.

O hweditše puku ya gagwe e se gona ka morago ga nako ya go khutša, mokotlana wa gagwe o be o bulegile. Puku ya gagwe ya Sepedi e be e se gona.



Ba lebelela puku gohle le ka mekotlaneng ya barutwana. Eupša ba se ke ba e hwetša.

Morutiši a kgopela barutwana ka moka go tla moo pele.

Morutwana yo mongwe le yo mongwe o be a swanetše go emiša letsogo.

Se e bile bothata go Lesedi morwa wa Malete. O be a dula a iša matsogo a gagwe a a emišitšwego fase dimpeng tša gagwe.



Morutiši a botša Lesedi gore a eme bogareng
bja phapoši.

O ile a mo kgopela gore a emišetše matsogo
godimo a be a tabogele godimo.

A taboga gatee gomme a swara dimpa
tša gagwe.

Ge a taboga labobedi, puku ya tšwa ka jesing
ya gagwe.

Lesedi a leka go kgoromeletša puku morago,
eupša ya no wela maotong a gagwe.



Mahlo ka moka a be a lebeletše Lesedi.
Barutwana ba dirile lešata, ba mo sega, le go
mo kwera.

Ba goelela:” Lesedi wa Maletse ke lehodu!”
Lesedi o be a sa kgolwe gore seo se a mo
diragalela.

O be a nagana gore o a lora. O be a duma o
ka re lefase le ka bulega le mo metše.



Barutwana ba bantši ba be ba thabetše gore
Lesedi o hweditšwe ka puku ya Koki.

Lesedi o be a na le bagwera ba bangwe ba
bararo ba go seleka.

Ba be ba dula ba tshwenya basetsana le
bašemane ba bannyane ka phapošing.
Taba ye ga se ya ka ya begelwa morutiši.

Barutwana ba be ba tšhaba go bethwa ke
Lesedi le bagwera ba gagwe.

Lesedi bjale o be a hweditšwe; gomme a
lebelela fase ka dihlong.



Moruti a botša Lesedi gore a tšee puku
maatong a gagwe.

Morutiši a mo kgopela go bala leina leo le
ngwadilwego pukung.

Barutwana ka moka ba homola ba theeletša
ge Lesedi a bala.

A bala leina la Koki ka dihlong a thothomela.
Barutwana ba mo sega ba mo kwera gore
ke lehodu.

Ba bolela gore lehodu la ka phapošing le
hweditšwe.



Morutiši a homotša barutwana a kgothatša Lesedi. A fa barutwana mošomo gore ba o ngwale. O ile a tloga le Lesedi ba ya go hlogo ya sekolo.

Lesedi a dumela gore o utswitše puku ya Koki. O be a sa thabele gore Koki o kaone go mo feta ka phapošing.

Lesedi le yena a goboša bagwera ba gagwe a be a bolela dilo ka moka tšeo ba di dirilego ka phapošing.

Morutiši a boela ka phapošing a ya go tšea bagwera ba Lesedi.

CIPALS
FFICE



Bagwera ba Lesedi ba se ke ba senya nako go utolla dilo tše mpe tšeo ba di dirilego.

Ba dumela gore ba utswitše diphensele, dijo, le tšhelete.

Batswadi ba bona ba be ba sa kgone go dumela gore bana ba bona ke mahodu.

Ba kgopela tshwarelo pele ga hlogo ya sekolo le morutiši.

Ba tshepiša go lefa tšhelete ya dilo ka moka tšeo di utswitšwego.

Ba tshepiša go ruta bana ba bona go tlogela bohodu.



Lesedi le bagwera ba gagwe ba boela
phapošing ba swerwe ke dihlong.

Ba be ba lla ge ba kgopela tshwarelo pele ga
barutwana-ka-bona.

Ba kgopela go swarelwa ka tše mpe tše ba
di dirilego.

Ba be ba lewa ke dihlong ba ikokobeditše.
Motho o be a ka ba kwela bohloko.

Barutwana-ka-bona ba sa kgone go dumela
gore ke bona bale ba go tshwenya.



Morutiši o ba file mošomo wa go hlwekiša phapoši kgwedi ka moka.

Ba be ba swanetše go phela ka khutšo le barutwana ba bangwe.

A ba arogantšha a ba fa barutwana ba bakaone go ba bagwera ba bona.

Morutiši a hlohleletša barutwana go bega ge go na le batho bao ba ba tshwenyago.

Ka go dira seo go utswa go tla fedišwa ka phapošing.

Go tloga letšatši leo go bile le phetogo go Lesedi le bagwera ba gagwe.

DITEBOGO

Mongwadi ke

Khanyisa Mukansi

Moswantšhi ke

Lutfia Kamish-Ebrahim

Molekodi ke

Pandelani Claudine Rambau

Deborah Shilenge

Rebecca Maluleke

Mohlami ke

PixelPing Design

Mofetoši wa puke ke

Maureen Ramusi

Motsinkedi wa puku ke

Makoma Phatudi



ISBN 978-0-638-00765-7



basic education
Department:
Basic Education
REPUBLIC OF SOUTH AFRICA

